

豫

章

焚

書

第八册

尙論後篇卷三諸方目錄

太陽傷風諸方 計十五方除重

太陽傷寒方 計三十九方除重附

太陽兩傷方 計十方除重

尙論張仲景傷寒論太陽本經諸方脉症卷之三

西昌喻昌嘉言甫著

尙論諸方大意

仲景一百一十三方用本草九十一種耳仲景
上遡神農本經藥三百六十五種効法周天三
百六十五度之數應三才而合四時妙義開天
也仲景取述神農本經藥品纔九十一種入傷
寒論中輔相裁成有合六經之大綱者有合六
經之一目者蓋神農百病兼收而仲景則由六
經以例百病所以於上古本經取裁九十一種

用之不盡萬世而後星日炳然聖之又聖者矣
梁陶隱君別錄倍之爲七百三十種迨唐本圖
經證類宋嘉佑政和旁搜編錄於是旁門捷徑
各自成名者多矣而仲景宮牆生色間出英賢
數十輩尤爲不孤識大識小總計一千七百四
十六種病雖百疾藥無纖漏天下後世永賴焉
然一千七百四十六種顯現億兆如同一日昭
式乃至漸推漸廣觀察盡矣何獨仲景九十一
種賢哲挺生莫識厥旨昌也晚進無識手集神
農本經竊以傷寒論中藥品爲主其晉唐以後

諸賢發揮傷寒論全方有得者亦一一錄出而
昌亦少步尙論諸方之後總欲門下好學隨證
問藥一目瞭然無檢書之苦難是慰耳

太陽經風傷衛方

辨中風證用桂枝湯解肌大綱總法

桂枝湯方

桂枝三兩去皮
味辛熱

芍藥三兩味苦
酸微寒

甘草二兩

炙味
甘平

生薑三兩切
味辛溫

大棗十二枚
味甘溫

右五味㕮咀以水七升微火煮取三升去滓適寒
溫服一升服已須臾歠熱稀粥一升餘以助藥力

溫覆令一時許遍身熱熱微似有汗者益佳不可
令如水流漓病必不除若一服汗出病差停後服
不必盡劑若不汗更服依前法又不汗後服小促
役其間半日許令三服盡若病重者一日一夜服
周時觀之服一劑盡病證猶在者更作服若汗不
出者乃服至二三劑禁生冷粘滑肉麵五辛酒酪
臭惡等物

太陽中風陽浮而陰弱陽浮者熱自發陰弱者汗自
出嗇嗇惡寒淅淅惡風翕翕發熱宜桂枝湯

仲景原文

風之傷人也頭先受之故令頭痛風在表則表實

故令發熱風爲陽氣亦爲陽同類相從則傷衛外之氣衛傷則無以固衛津液故令汗出其惡風者衛氣不能衛也其脉緩者衛氣不能鼓也上件皆太陽症故曰太陽中風桂枝辛甘辛則能解肌甘則能實表內經曰辛甘發散爲陽故用之以治風然恐其走泄陰氣故用芍藥之酸以收之佐以生薑甘草大棗此發散而兼和裏之意是方也惟表邪乃可用之若陽邪去表入裏裏作燥渴二便秘結此宜承氣之時也而誤用之則反矣昌按承氣之誤庸者固然而工者悞在微細仲景諄切不似

此項逐條本文詳玩始獲

凡桂枝湯病症者常自汗出小便不數手足溫和或手足指稍露之則微冷覆之則溫渾身熱微煩而又憎寒始可行之若病者無汗小便不數手足溫和或手足逆身冷不惡寒反惡熱或飲酒後慎不可行桂枝湯也脉緊必無汗有汗不可悞作桂枝症此脉與症仲景說得甚明後人看不透所以不敢用此方假令寸口脉微名曰陽不足陰氣上入陽中則洒淅惡寒也尺脉弱名曰陰不足陽氣下陷入陰中則發熱也此謂元氣受病而然也又

曰陽微則惡寒陰微則發熱醫既汗之使陽氣微
又大下之令陰氣弱此謂醫所使也大抵陰不足
陽往從之故陽內陷而發熱陽不足陰往乘之故
陰上入陽中則惡寒舉此二端明白易曉何憚而
不用桂枝湯哉

仲景治表虛製此湯桂枝味辛熱發散助陽體輕
本乎天者親上故桂枝爲君芍藥甘草佐之如陽
脉濇陰脉弦腹中急痛乃製小建中湯以芍藥爲
君桂枝甘草佐之一則治其表虛一則治其裏虛
故各有主用也

以桂枝易肉桂治傷寒腹痛神品藥也如夏中熱
腹疼少加黃芩去桂痛立止桂於春夏二時爲禁
藥

按經云桂枝入咽陽盛則斃春夏發者爲禁藥也
桂能動血血熱者爲禁藥也木得桂而死肝不足
者爲禁藥也

桂枝湯右禁用三法 仲景本文并昌論

汗後水氣上逆有禁更汗增滿一法 本文并昌論

中風病主用桂枝湯解肌和營衛七法 本文并昌論

或問桂枝湯發字之議曰一桂枝耳或云發汗或

云當得汗解或云當發汗更發汗宜桂枝湯者數方是用桂枝發汗也復云無汗不得用桂枝又曰汗家不得重發汗又曰發汗過多者都用桂枝甘草湯是閉汗也一藥二用如何說得仲景發汗與本草出汗之義相通爲一答曰本草云桂枝辛甘熱無毒能爲百藥之長通血脈止煩出汗者是調血而汗自出也仲景云藏無他病發熱自汗者此衛氣不和也又曰自汗出爲營氣和營氣和則外不諧以衛氣不與營氣和諧也營氣和則愈故皆用桂枝湯調和營衛營衛旣和則汗自出矣風邪

由此而解非桂枝能於腠理發出汗也以其固閉營血衛氣自和邪無容地而出矣其實則開汗孔也昧者不解開汗之意凡是病者俱用桂枝湯發汗若與中風自汗者合效如桴鼓因見其取効而病愈則曰此桂枝發出汗也遂不問傷寒無汗者亦與桂枝湯悞之甚矣故仲景言無汗不得服桂枝是開汗孔也又曰發汗多必手冒心心悸欲得按者用桂枝甘草湯是亦開汗孔也又曰汗家不得重發汗若桂枝湯發汗是重發汗也凡桂枝條下言發字當認作出字是汗自然出也非若麻黃

能開腠理而發出汗也本草出汗二字上文有通
血脉一句是非三焦衛氣皮毛中藥是爲營血中
藥也如是則出汗二字當認作營衛和自然汗出
非桂開腠理而發出汗也故後人用桂治虛汗讀
者當逆察其意則可矣噫神農作於前仲景述於
後前聖後聖其揆一矣

不解肌或悞汗病邪入裏用五苓兩解表裏二法
一法水逆用之多服煖水汗出愈

一法脉浮小便不利微熱消渴者用之

五苓散方

猪苓

十八銖
去皮

茯苓

十八銖

澤瀉

一兩
六銖

白朮

十八銖

桂

半兩

右五味爲散以白飲和服方寸七日三多服煖水

汗出愈

、不解肌而悞發大汗其變逆有救亡陽漏風二法

一法真武

一法桂枝加附子湯

真武湯方

此本少陰經之神方并加減法而太陽上篇
先錄之至太陽下篇尤宜緊要先同錄此

茯苓

三兩

芍藥

三兩

生薑

三兩切

白朮

二兩

附子

一枚炮去皮破八片

右五味以水八升煮取三升去滓溫服七合日三服

桂枝加附子湯

於桂枝湯內加附子一枚餘依桂枝湯法

、不解肌而用燒鍼取汗寒入核起灸核止變一法

桂枝加桂湯更加桂

於桂枝湯方內更加桂枝二兩

、中風肌未解不可下宜用桂枝湯解外一法

桂枝湯

方見前

不解肌反悞下邪不服者於前下藥內更加桂枝湯一法

卽桂枝大黃湯之互詞因上衝陽位故兩解之也不上衝者不用此方

不解肌反悞下心痞用溫補藥兩解表裏一法

桂枝人參湯

卽理中加桂枝而易其名也

桂枝四兩
去皮

甘草四兩
炙

白朮三兩

人參 三兩 乾薑 三兩

右五味以水九升先煎四味取五升內桂枝更煮取三升去滓溫服一升日再服夜一服

或問大柴胡瀉也桂枝人參湯補也何爲皆治下利心下痞鞭曰此非裏熱乃下之早因作痞裏虛協熱而利表又不解故與桂枝人參湯和裏解表若夫傷寒發熱汗出不解心下痞鞭嘔吐而不利者表和而裏病也以心下痞鞭故爲實當以大柴胡下之二者心下痞鞭雖同而虛實之症有別故用藥有攻補之異